

Despues di mas cu 2 aña cu nan tabata cera

Biblioteca Nacional a celebra nan apertura oficial



Minister Arthur Dowers skirbiendo su deseo ariba e "Cadushi di deseo"



Artista Plastico Srta. Lara Kuiperi hunto cu Directora Astrid Britten y Minister Arthur Dowers



Sra. Astrid Britten, Directora di Biblioteca Nacional



Vivian Lampe, Sr. Padu Lampe, Parlamentario Marlon Sneek y Parlamentario Lorna Varlack



Dr. Livio Hermans



Coro La Escala



Publico presente den sala principal

ORANJESTAD – Diadomingo ultimo Biblioteca Nacional a celebra su apertura oficial den nan sala principal. Cu presencia di Minister di Enseñansa, Minister Arthur Dowers, como tambe nos asina yama Tata di Cultura, Sr. Padu Lampe y un programa varia di historia, musica y arte, e anochi a inicia.

"Nos ta ubica den e edificio aki desde prome di September di aña 1980, kiermen mas cu 30 aña pasa nos tabata den e situacion similar. Tambe nos a pasa den un periodo di mas cu 2 aña cu biblioteca tabata cera y finalmente manera nan ta bisa "penado no ta pena pa largo," awe nos ta bek den e edificio akinan," Sra. Astrid Britten, Directora di Biblioteca Nacional a bisa **BON DIA ARUBA**.

E Directora ta splica cu desde fin di Augustus nan ta den un "soft opening" operacional caba pero cu e anochi aki nan toch nan kier a pone enfasis y efectua e re-apertura oficial unda tur hende por haya nan lugha bek den nan instituto asina importante cu no solamente ta un lugha di fia buki pero tambe un lugha di encuentro y un centro di conocimiento.

"Den cuadro di esaki Biblioteca Nacional tambe a bin cu un website nobo y free wifi", Britten a bisa, gradiciendo Setar pa nan vision y pa

kier ta un partner cu nan den esaki.

Maestro di Ceremonia tabata Sra. Lourdes Croes y e apertura a inicia cu un presentacion visual di e renobacion di e edificio na George Madurostraat. Livio Hermans a toca piano durante e ceremonia como tambe Aruba su Himno y Bandera, "Aruba dushi tera." Livio a interpreta e himno di Aruba y e wals di Padu del Caribe, titula 'Biblioteca Nacional'. Un composicion cu ta riba un CD di Padu di aña 1994 y for di e tempo ey biblioteca ta consider'e su himno. Declamacion di poema di Sra. Digna Lacle-Herrera titula "Nos orguyo e ta!" a continua. Asina tambe Directora Astrid Britten mes a hiba palabra, continua pa Minister Arthur Dowers.

Como acto simbolico di artista plastico Sra. Lara Kuiperi cu a haci entrego di su obra su obra "Cadushi di deseo", caminda tur hende por skirbi nan deseo ariba e cadushi.

Coro di Escala tambe a duna su presentacion musical y rumannan Gregory y Tammy Richardson a haci presentacion di nan buki "Sibling voices of Sunrise City". Roberto Croes a declama su poema "Un buki" y finalmente tabata tin un brindis cu acompaña musical di Carlos Bislip Jr. □